

Eingang.

Geliebte vnd Außzerwehlete im
HERREN Christo / Es sagt der
Königliche Prophet / Psalm. 42:
Deine flutt rauschen daher / aby-
sus abyssum invoc at, dz hie eine tieffe / vnd da
eine tieffe brausen / Alle deine Wasserwogen
vñ Weilen gehen ober mich: Vnd Psal. 80.
Du speisest sie mit threnen Brodt / vnd tren-
ckest sie mit grossem maß voll threnen. Mit
welchen Worten der Heilige Geist beschrei-
bet die natur vnd eigenschafft des Creuzes.
Denn das liebe Creutz ist selten alleine / wens
kompt so kompts hauffen weise / vnd wil da
fast kein ende noch auffhören sein / ein Un-
glück beut dem andern die hand. Solchs
geben die Exempel / Job war ein heiliger
vnd Gerechter Mann / des gleichen zu seiner
zeit auff Erden nicht gewesen / den betraff
immer ein Unglück nach dem andern.